



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT KEDUA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Pembinaan Bilik Sejuk Beku (*Cold Room*)**
- *YB. Dato' Sri Hasan bin Arifin (Rompin)* (Halaman 1)
- **Perluakah Dua Aliran Berbeza, STPM dan Matrikulasi**
- *YB. Tuan Sivakumar Varatharaju Naidu (Batu Gajah)* (Halaman 2)

MALAYSIA
KAMAR KHAS
PARLIMEN KEEMPAT BELAS
PENGGAL KEEMPAT
MESYUARAT KEDUA

Khamis, 18 November 2021

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

UCAPAN DI BAWAH USUL
BERKENAAN PERKARA TADBIR KERAJAAN (P.M. 17)

Pembinaan Bilik Sejuk Beku (*Cold Room*)

2.34 ptg.

Dato' Sri Hasan bin Arifin [Rompin]: *Assalamualaikum warahmatullaahi wabarakaatuh* dan salam sejahtera. Tuan Yang di-Pertua, merujuk kepada perkara di atas, saya ingin menarik perhatian pihak Lembaga Pemasaran Pertanian Persekutuan (FAMA) dan Kementerian Pertanian dan Industri Makanan berhubung permohonan bagi membina bilik sejuk beku (*cold room*).

Sebagai makluman, saya telah membuat satu rancangan tambahan dengan pihak FAMA sebelum Pilihan Raya Keempat Belas untuk membina bilik sejuk beku (*cold room*) bagi kegunaan petani dan penternak ikan air tawar di daerah Rompin. Bilik sejuk beku ini merupakan antara kemudahan infrastruktur kepada para petani dan penternak ikan air tawar bagi tujuan menyimpan produk pertanian dan ternakan mereka.

Kertas cadangan mengenai projek ini telah dihantar dan tapak projek juga telah dikenal pasti. Justeru itu, saya ingin mengetahui apakah kedudukan atau status semasa bagi projek ini. Sekian sahaja ucapan usul saya. Ribuan terima kasih saya ucapkan kepada Tuan Yang di-Pertua.

2.35 ptg.

Timbalan Menteri Pertanian dan Industri Makanan II [Dr. Nik Muhammad Zawawi bin Haji Salleh]: *Assalamualaikum warahmatullahi wabarakaatuh* dan salam sejahtera. Tuan Yang di-Pertua dan Yang Berhormat Rompin. Untuk makluman, Kementerian Pertanian dan Industri Makanan (MAFI) amat menghargai keprihatinan Yang Berhormat Rompin terhadap petani dan nelayan ikan air tawar di kawasan Rompin.

Berhubung kertas cadangan Yang Berhormat yang telah dikemukakan kepada FAMA, pihak FAMA telah mengemukakan tiga permohonan kepada pihak Unit Perancangan Ekonomi, Jabatan Perdana Menteri (UPE JPM) dalam permohonan *Rolling Plan* Kedua tahun 2017, *Rolling Plan* Ketiga tahun 2018 dan

Rolling Plan Kedua tahun 2022. Dukacita dimaklumkan ketiga-tiga permohonan tersebut tidak diluluskan.

Walau bagaimanapun pihak FAMA akan menyediakan satu unit bilik sejuk mudah alih dengan kapasiti penyimpanan sebanyak 10 metrik tan di tanah milik FAMA di hab sementara Mukim HSD5089, No. PP40 Kuala Rompin, Rompin Pahang Darul Makmur. Penyimpanan di bilik sejuk ini adalah sesuai bagi komoditi buah-buahan dan sayur-sayuran dan dijangka akan mula beroperasi pada Mac 2022. Mana-mana petani yang ingin menyewa bilik sejuk ini pada kadar sewaan yang minimum, boleh menghubungi Pegawai FAMA daerah Rompin.

Selain itu, MAFI melalui Lembaga Kemajuan Ikan Malaysia (LKIM) juga telah menyediakan dua unit bilik sejuk di Kompleks LKIM Kuala Rompin yang berkapasiti 10 metrik tan setiap satu. Bilik sejuk ini diselenggara oleh Persatuan Nelayan Kawasan (PNK) Rompin dan boleh disewa kepada mana-mana pengusaha, penternak ikan air tawar kepada kadar sewa yang berpatutan. Sekian, terima kasih.

Dato' Sri Hasan bin Arifin [Rompin]: Terima kasih Tuan Yang di-Pertua dan Yang Berhormat Timbalan Menteri. Rompin terkenal dengan...

Timbalan Yang di-Pertua [Dato' Mohd Rashid Hasnon]: Yang Berhormat, dalam Peraturan Mesyuarat 17, tidak ada jawapan balas.

Dato' Sri Hasan bin Arifin [Rompin]: Tidak ada?

Timbalan Yang di-Pertua [Dato' Mohd Rashid Hasnon]: Cuma terima jawapan yang ditetapkan dan bertulis. Jawapan nanti boleh ambil daripada...

Dato' Sri Hasan bin Arifin [Rompin]: Maknanya soalan tambahan tidak ada? *[Ketawa]*

Timbalan Yang di-Pertua [Dato' Mohd Rashid Hasnon]: Ini Peraturan Mesyuarat 17. Kalau Peraturan Mesyuarat 18, ya. Terima kasih Yang Berhormat Rompin.

Perlukah Dua Aliran Berbeza, STPM dan Matrikulasi

2.39 ptg.

Tuan Sivakumar Varatharaju Naidu [Batu Gajah]: Terima kasih Tuan Yang di-Pertua. Perlukah negara kita mempunyai dua aliran yang berbeza dalam sistem pendidikan di peringkat menengah tinggi? Selepas menduduki peperiksaan SPM, pelajar-pelajar yang lulus boleh menyambung pendidikan mereka dalam pelbagai institusi yang berbeza sama ada melalui pendidikan awam mahupun pendidikan swasta.

Walaupun terdapat pelbagai pilihan tetapi saya ingin fokus kepada dua aliran yang sentiasa mendapat perhatian umum iaitu pendidikan matrikulasi dan tingkatan Enam (STPM). Kedua-dua aliran ini adalah asasi untuk melanjutkan pelajaran ke menara gading. Dua sistem yang berbeza ini melahirkan pelbagai kontroversi setiap tahun. Ramai daripada kalangan pelajar-pelajar cemerlang yang berminat untuk memasuki matrikulasi gagal untuk mendapat tempat yang dicita-citakan. Mereka terpaksa mengikuti pelajaran mereka di tingkatan enam atau berganjak ke *A-Level*. Ramai daripada kalangan mereka berasa kecewa dan

putus asa dengan sistem pendidikan kita yang tidak mempunyai hala tuju yang jelas.

Pada hemat saya, setiap pelajar perlu diberi peluang dan kemudahan yang sama supaya kita dapat menilai kebolehan dan kepintaran melalui satu mekanisme yang sama. Kaedah yang adil ini adalah amat penting di peringkat menengah tinggi supaya dapat kita melahirkan generasi muda yang berdaya saing. Adakah kerajaan mempunyai hasrat untuk mewujudkan satu sistem pendidikan yang mempunyai aliran yang sama di peringkat prauniversiti bagi semua pelajar yang berminat untuk memasuki universiti? Apakah langkah-langkah kerajaan untuk memperbaiki sistem yang sedia ada?

Perkara ini adalah mudah untuk dilaksanakan oleh Kementerian Pendidikan Malaysia. Kerajaan boleh memilih untuk menghapuskan STPM dan digantikan dengan matrikulasi ataupun menghapuskan matrikulasi dan digantikan dengan STPM. Saya percaya cara ini akan meningkatkan mutu pendidikan negara dan kecemerlangan pelajar-pelajar yang terpaksa mengharungi pelbagai cabaran dalam dunia pendidikan norma baharu.

Tuan Yang di-Pertua, saya juga ingin mengetahui jumlah pelajar-pelajar yang memasuki tingkatan enam (STPM) dan matrikulasi pada tahun ini mengikut komposisi kaum. Sekian, terima kasih.

2.42 ptg.

Timbalan Menteri Pendidikan II [Datuk Mohamad bin Alamin]: *Assalamualaikum warahmatullahi wabarakatuh.* Terima kasih kepada Yang Berhormat Batu Gajah. Tuan Yang di-Pertua, Kementerian Pendidikan Malaysia (KPM) mengucapkan terima kasih kepada Ahli Yang Berhormat Batu Gajah terhadap keprihatinan beliau mengenai pendidikan Tingkatan Enam dan Program Matrikulasi dalam Kamar Khas pada kali ini. KPM sentiasa komited untuk menyediakan akses dan laluan terbaik kepada murid untuk melanjutkan pelajaran ke institusi pengajian tinggi (IPT).

Untuk makluman Ahli Yang Berhormat, Pendidikan Tingkatan Enam dan Program Matrikulasi adalah pendidikan lepas menengah di bawah Sistem Pendidikan Kebangsaan yang ditubuhkan oleh Menteri berdasarkan kepada Akta Pendidikan 1996 [Akta 550]. Kedua-dua program pendidikan ini merupakan peringkat pendidikan lepas menengah yang menyediakan murid untuk pendidikan tinggi. Namun begitu, kedua-dua program pendidikan ini berbeza daripada segi objektif penubuhan, pengoperasian, kurikulum dan pensijilan.

Pada dasarnya, Pendidikan Tingkatan Enam ditubuhkan sebagai persediaan memasuki pengajian peringkat ijazah pertama sama ada di dalam atau luar negara. Pendidikan Tingkatan Enam juga menyediakan pendidikan yang setara dengan program prauniversiti yang ditawarkan oleh institut pengajian tinggi bagi memastikan murid lulusan peperiksaan Sijil Tinggi Persekolahan Malaysia (STPM) mempunyai nilai kebolehpasaran yang tinggi.

Bagi tujuan memperkasakan tingkatan enam, hasrat ini dijadikan inisiatif dan Pelan Pembangunan Pendidikan 2013/2025 di bawah Penjenamaan Semula Pendidikan Tingkatan Enam. Inisiatif ini bertujuan untuk:

- (i) memperkasa pendidikan Tingkatan Enam melalui peningkatan sistem dan kualiti pendidikan serta imej setaraf dengan pendidikan lepasan menengah yang

lain seperti matrikulasi atau Pusat Asasi Sains sebagai salah satu laluan utama murid untuk melanjutkan pelajaran ke universiti;

- (ii) mengubah persepsi masyarakat terhadap pendidikan Tingkatan Enam; dan
- (iii) membangun dan memupuk nilai kepimpinan yang tinggi dalam kalangan murid tingkatan enam.

Penubuhan Program Matrikulasi KPM adalah berdasarkan keputusan Mesyuarat Jemaah Menteri pada 10 Mac 1999. Program ini adalah laluan alternatif yang disediakan kepada lulusan Sijil Peperiksaan Malaysia (SPM) untuk melanjutkan pengajian ke peringkat ijazah pertama di universiti awam dalam bidang sains, teknologi dan profesional.

Untuk makluman Ahli Yang Berhormat, kerajaan telah menyediakan pelbagai saluran sebagai persediaan untuk murid melanjutkan pendidikan ke peringkat ijazah pertama. Selain daripada Program Matrikulasi, murid lepasan SPM juga boleh memohon untuk melanjutkan pelajaran ke tingkatan enam, program asasi dan diploma di universiti awam sebagai persediaan melanjutkan pendidikan ke peringkat ijazah pertama.

Bagi tujuan kemasukan ke universiti awam, semua murid daripada pelbagai saluran ini mempunyai peluang yang sama berdasarkan prinsip meritokrasi. Berdasarkan prinsip ini, semua calon dengan markah merit tertinggi tanpa mengira kaum, agama, negeri, taraf hidup dan tempat tinggal diberi peluang yang sama rata untuk menyambung pengajian di universiti awam yang dimohon.

Tuan Yang di-Pertua, walaupun pendidikan Tingkatan Enam dan Program Matrikulasi adalah dua program yang berbeza daripada segi pengoperasiannya. Namun demikian, kedua-dua program ini jelas mempunyai hala tuju yang sama iaitu sebagai laluan kepada murid untuk melanjutkan pelajaran ke peringkat ijazah pertama. Selain itu, pendidikan Tingkatan Enam dan Program Matrikulasi mempunyai peranan dan kelebihan yang tersendiri dalam menyediakan peluang pendidikan kepada murid. Tingkatan Enam menyediakan murid untuk menduduki peperiksaan awam iaitu Sijil Tinggi Pelajaran Malaysia (STPM). STPM adalah peperiksaan awam yang diiktiraf pada peringkat antarabangsa setaraf dengan *General Certificate of Education (GCE A-Level)* oleh *Cambridge Assessment International Education* untuk tujuan kemasukan ke universiti.

STPM telah diiktiraf oleh semua universiti awam di Malaysia dan lebih daripada 1,400 buah universiti di seluruh dunia dan 650 buah universiti di Amerika Syarikat. Selain itu, STPM turut diterima oleh Jabatan Perkhidmatan Awam (JPA) bagi tujuan pelantikan dalam perkhidmatan awam.

Manakala, murid yang menamatkan pengajian dalam Program Matrikulasi dianugerahi Sijil Matrikulasi KPM yang diiktiraf oleh JPA melalui Surat Pekeliling Perkhidmatan Bil. 3 tahun 2016, kelayakan Sijil Matrikulasi Kementerian Pendidikan Malaysia bagi tujuan pelantikan ke dalam perkhidmatan awam. Kemasukan bagi pemegang Sijil Matrikulasi KPM ke dalam perkhidmatan awam telah ditetapkan pada Gred 29 dengan skim perkhidmatan iaitu setara dengan pemegang diploma.

Sehubungan dengan itu, KPM menetapkan bahawa Pendidikan Tingkatan Enam dan Program Matrikulasi masih perlu dikekalkan bagi memenuhi keperluan pendidikan murid. Pendidikan Tingkatan Enam merupakan peringkat pendidikan

lepas menengah yang menganugerahkan sijil peperiksaan untuk kemasukan ke institusi pendidikan tinggi. Manakala matrikulasi ialah program persediaan yang menjurus kepada bidang tertentu sebagai laluan alternatif ke pendidikan tinggi.

Tuan Yang di-Pertua, sehingga kini terdapat sejumlah 55,158 orang murid tingkatan enam semester satu sedang mengikuti pengajian di semua kolej atau pusat tingkatan enam di seluruh negara. Daripada jumlah keseluruhan murid tingkatan enam, seramai 41,573 orang murid adalah daripada kaum Melayu atau bumiputera, seramai 8,573 orang murid kaum Cina, seramai 3,360 orang murid kaum India dan seramai 1,550 orang murid daripada pelbagai kaum.

Tuan Yang di-Pertua, sementara itu dasar pengambilan pelajar ke Program Matrikulasi pada tahun ini masih dikekalkan iaitu 90 peratus bagi pelajar bumiputera dan 10 peratus bagi pelajar bukan bumiputera. Bagi pengagihan kuota 10 peratus kepada pelajar bukan bumiputera, pada 6 Mei 2020, kerajaan telah memutuskan bahawa peratusan pengambilan pelajar adalah mengikut nisbah 5.43 peratus untuk kaum Cina, 3.72 peratus untuk kaum India dan 0.85 peratus lain-lain. Oleh yang demikian, tawaran kemasukan ke Program Matrikulasi adalah mengikut komposisi yang telah ditetapkan. Sekian dan terima kasih.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas ini ditangguhkan hingga hari Isnin, 22 November 2021 jam 2.30 petang. Terima kasih Ahli-ahli Yang Berhormat.

[Kamar Khas tamat pada pukul 2.52 petang]